

鶴峯州志卷十二

人物

邑沿千百年溪崗之舊欲其去喬野而敦詩書化  
獷悍而作忠義蓋非旦夕可致矣然其間膺選舉  
而隸仕版者時不乏人他如疆場捐軀閨閣完貞  
與夫敦倫飭行足以表率閭鄙者且後先相望焉  
固由山川磅礴之氣鍾毓爲多抑亦

國家太和翔洽遍及荒陬之所致也昔孫子荆論土  
地人物之美其山巖巍而嵯峨其水泮渌而揚波  
其人礪砢而英多不信然歟木一樹而十穫人一

鶴峯州志

卷十二

人物

一

樹而百穫茲嘉與生長斯土者鴟黠鳧藻翩然偕  
來安知芸夫牧豎不皆爲搢紳先生哉志人物

選舉

舉人

洪先燾

乾隆戊申科中式第七名

選拔

部生榕

乾隆己酉科

田福康

嘉慶癸酉科

恩貢

向廷杰

潘如珍

李先春

游永興

劉漢珂

歲貢

鶴峯州志

卷十二

人物

二

龔傳諭

部生崧

何夢芝

劉美

劉祚鳳

楊盛典

劉正梅

張賜彥

趙正德

廩貢

洪先緒

喻章珩

附貢

劉正性

龔經德

周必超

李洪秀

馬大文

文仕進

知縣

洪先燾任廣東三水縣歷署大埔南海  
教諭

部生榕署任公安縣學

訓導

龔傳諭任蒲圻縣學

部生崧任漢陽縣學

洪先緒歷署江陵枝江縣學

喻章珩歷署安陸府蒲圻縣學

雜職

覃倫純任四川石泉縣典史 吏員

鶴峯州志

卷十一

人物

三

聶愈煥任安徽岳山司巡檢 附生

武仕進

吳開泰任福建延平協副將

向進才任廣東那扶營都司

張映槐任福建長樂營守備

陳連陞任保康營守備

張兆虎任衛昌營千總

聶永春任興山營千總

張士魁任宜昌鎮中營千總

劉榮任宜都營把總

袁光宗任衛昌營把總

田繼秀任衛昌營把總

汪廷舉任陝西千總

洪永科任宜昌鎮中營把總

袁文任宜昌鎮中營把總

周朝相任宜昌鎮中營把總

雷開科任衛昌營外委把總

向升榮任施南協外委把總

袁光先任衛昌營外委把總

陳元任衛昌營外委把總

鶴峯州志

卷十一

人物

四

胡士雄任宜都營外委把總

張士元任衛昌營外委把總

鄧開榜任衛昌營外委千總

黃登鏊任宜昌鎮中營外委

李輔臣任衛昌營外委

雲騎尉世職

劉朝相以父劉榮廕

向錫爵以父向升榮廕

田大英以父田繼秀廕

雷開位以兄雷開科廕

雷克振以承繼雷開科廕

恩騎尉世職

張士魁以父張兆虎廕

按地不必皆名勝人不必皆高位而海剛峯以瓊州興楊椒山以典史顯彼固有足重者存也一命之士苟存心愛物於人必有所濟徒誇閭里而耀鄉黨甚哉淺之乎爲丈夫也

義行

洪永清城坊人其先世自安慶來山遂家焉清容  
美時負販爲業家漸裕改土後與弟永源永隆  
均財分爨友于無間時邑多桀驁子弟橫逆相  
加笑謝之不與較中年喪偶不復娶子繼文繼  
武早卒故朝夕經紀家務孫殿選聖時入武庠  
意弗慊也囑長子繼周延師課子以紹江左書  
香病革時孫先燾赴鄉試語家人曰吾病已不  
支而燾孫必中蓋以夢兆卜也不數日殂燾果  
獲雋

劉世顯千金坪諸生果敢有爲鄉里公舉每身任  
之遇爭訟者力爲勸解邑改土三十餘年未設  
學世顯倡首由州上籲各憲得 奏准設學額  
八名乾隆三十四年開考取士世顯同子正性  
俱入泮人以爲急公之報正性於邑修理 交  
武廟慷慨倡捐擘畫周詳工賴以竣世顯孫三  
庠生二曾孫六庠生一蓋四世青衿焉

部錫侯原籍澧州諸生遷邑和平里以孝友聞前  
知州李林延爲九峯書院山長來學者先命嫻  
習禮儀因材訓迪娓娓不倦時邑請設學慮土

籍能文者少擬客土分額李謂錫侯掌教有造於邑人將編入土籍爲報雖事未果行而已以土籍存檔矣子四太學生二孫十一拔貢一歲貢一庠生四太學生四

何士敦原籍桃源年八歲而孤弱冠棄舉子業肩家事撫兩弟成立婚娶無間言析居時並出妻奩貲與弟均分里黨咸義之旣遷邑三义口以詩書課子孫爲急務邑請設學命長子清與焉平生言動不苟家政嚴肅而和平接物人皆樂與之交子四歲貢生一

喻公禮城坊人誠樸簡重與人無競其兄充在城鄉約辨有口得前牧信任左右袒人不敢忤公禮諫弗納遂請析居命諸子各執一業而躬釣於河濱其兄沒後子式微而公禮孫明經一廩庠生三太學生一人咸謂忠厚之報云

李世龍水寨人躬耕自給族中有艱婚娶者嘗捐田畝以助其資爲人剛正不阿交遊有過必面折里中不肖子弟聞其警欬卽避之子二長名林安性爽直勇於爲義邑城修理及各廟皆賴以葺事福田寺出力尤多子邦瑛庠生

洪永源城坊人粗涉書史邑設學年已五十餘自恨不能應試喜勸人讀書常置酒食召里中子弟卽其家會課館師評定後列甲選者給以紙筆不合繩墨者正色責之其培植後進類如此子五其季名繼德因軍功得議敘以善醫名孫十一人一候選從九品一庠生

向鳳舉燕子坪人世業農嘗以未讀書爲恨且涕泣前牧李林創建九峯書院自請捐金助之李謂之曰爾不知學而急於興學如此子孫必有食其報者後其子廷杰爲邑恩貢首孫亦廩生

鶴峯州志

卷十二

人物

八

田萬應小蒿坪人性溫和尤善處橫逆兄弟析居後弟姪輩以游惰致貧乏常分潤之而不能供其揮霍一日適太平鎮諸弟姪毆之拔其髮辮其子欲訟之官力止之子四孫七庠生一部泮錫侯子太學生性直爽無隱情喜成人美始終力爲之盡尤篤於宗族其在原籍澧州不能婚姻者召之入山爲聘娶邑有公舉皆趨赴嘗重修學宮遍邑勸捐鳩工庀材寢食旁舍至落成始歸子四拔貢一餘皆庠生

李靜安水寨諸生父力田靜安喜讀書父審其能

計姓名卽自塾中召歸命之春靜安手書一卷  
且春且讀家人往視則米無完粒矣遂命卒業  
與劉世顯等請設學額居嘗爲人忠厚木訥無  
妄言戲語哦詩種花外無他好子三太學生一  
孫六庠生二

張俊城坊人少孤貧充營中書識以養母母嘗病  
俊割肱作羹以進尋愈後數年母沒俊廬於墓  
戚鄰憫其羸喻以毀不傷生乃掖之歸

謝士瑜城坊人與弟士璠同居以家計獨任而命  
士璠業儒喜排難解紛雖遇橫逆亦反覆開導  
或出以詼諧必得其心服乃己弟士璠天資英  
敏爲諸生歲科試屢冠軍以鄉試卒於途士瑜  
傷其志未遂抑鬱成疾不數歲亦卒

洪繼周永清子太學生少倜儻不羈稍長折節務  
醇謹懋遷化居而家益豐自奉淡泊而勇於濟  
急人借貸不稍吝或貧不能償卽不索凡焚券  
以數千計邑改土數十年城內外各廟宇日就  
傾塌周與部泮劉正性龔經德倡修 文武廟  
文昌廟又與劉龔諸人及喻文奇李林安倡修又與  
諸人分任福田寺募化一切購料督工及銀錢出入

俱手爲經營不敷則出己財以佐用其踴躍公  
事如此長子先燾以孝廉任知縣次子先緒以  
明經任訓導夫婦年登八十州牧吉鍾穎製文  
稱祝蓋紀實也

趙士剛原籍慈利三都容美改土後隨父移家走  
馬坪讀書通大義劉世顯等請設學赴省代籌  
資斧事得濟子儒珪儒欽力耕善治生季子學  
謨篤學不倦年四十餘與子政德同入泮學謨  
伉直耿介於公事有關利害正色直言豁如也  
課子嚴日無以一矜自足贊志而歿儒欽有捐

修義渡事詳營建志士剛孫十歲貢一庠生二  
周嘉瑛邑諸生下陽河人重然諾不苟取與鄉有  
爭訟者力勸阻必得解乃已儉自奉遇公事慨  
然解囊不稍吝教子嚴入泮者三胞弟光武善  
盧扁爲里人療病不受一錢其子必超附貢生  
以克家稱超子光勳庠生

龔傳璽字六瑞少由石門遷邑屬之關外與弟傳  
瑜同居肩家事勸瑜力學析爨後移家懶板櫂  
廢著鬻財命長子監生經緯次子州同經猷持  
籌握算課季子附貢生經德讀皆有成性爽直

與物無競病革戒諸子曰兒孫輩能讀固善不能則力田經商各有恒業舍此去惰游幾何諸子謹識其訓爲家法邑修理 文武廟文昌廟經德與其姻好劉正性皆慨然爲己任關外士民踴躍樂輸以二人爲之倡也孫十一太學生三庠生五曾孫十餘庠生二

胡仁則澧州人弱冠移家後溪坪習白圭計然事數年遷懶板櫂百舍重繭三貧五廉準物而估直以此居積致富先是懶板櫂戶口寥落自仁則懋遷商賈輻輳成市性謙和橫逆唾其面不

與較生平從無構訟事長次二子皆太學生三子維才州全銜季子維珍附貢生仁則未歿時子孫林立衣無羅紈出無輿馬其告戒儉約然也至今鄉人猶樂道其軼事以爲治生者法

孟士仁所坪人喜讀書通大義巡檢愛其才召爲攢典士仁端謹自愛財涉非義者輒麾去以致窘乏昆仲五將析箸諸弟以士仁負債百金係爲次兄姻事費用議將公產變還士仁曰券係我名我自有產不以累諸弟其長子起文意不欲次子起武慷慨請父將己應得田產立券出

售債得清鄉人皆以士仁篤友于而起武亦能繼父志云

戴士誠世居上陽河兄弟四人皆善事父母析爨後輪奉甘旨長兄移居兜長溝墾荒每歸省父母輒召與同餐諸弟恐妨父母膳有微言士誠獨以爲兄居深山食包穀以故兩老人憐之我輩治食當益豐諸弟如其言父母益心喜素豪爽喜濟人急癖書工吟詠教子孫悉衷諸道諸生周嘉殷者端方士語同學曰士誠行誼真吾輩師也

鶴峯州志

卷十二

人物

十三

向帝書大典河人力農事和平正直鄰有忿爭者必力爲和解身在則里無爭事身沒則鄉人思之

林遠占事親以孝聞生母卒事繼母如生母繼母壽至九十二歲未嘗一日遠離

劉綸音韭菜壩人性和平與人無競遇橫逆則斂手謝之鄉人皆服其長者子二次名人美太學生

王遂虎茅坪人世忠厚富而仁病革謂諸子曰凡親友借貸者有券在篋多不能償恐爾輩於我

歿後迫索盍焚其券以釋吾憂子從之至今衣食仍裕孫五人一名相儒太學生

田萬里原籍江西僑居邑太平鎮善醫市藥爲業遇貧乏者不取值人比之宋清先是其父與同姓某夥商權若兄弟後某死子幼萬里承父志遇之如同產

郭易開原籍公安僑居邑蓼紅溪性伉直喜排難解紛善岐黃術不索謝子三人一名傳薪補諸生

田清年龍潭坪人樸實公直重然諾鄉里事無鉅

細必倚焉前牧報舉鄉耆

牟昌元三岔口人力農爲業其母病禱於神願以身代一日母索肉食家貧市遠無以應昌元割左肱肉熟而進之母病遂漸愈

田正南五里坪人居近市多強梗或以橫逆相加雖唾其面弗較也善耕作家日以阜子四虎斗桂斗俱監生孫林立有游泮者

洪先緒繼周季子由廩貢援例分發訓導歷署江陵枝江縣學事性廉敏財利無所苟邑有公事必毅然引爲己任分校邑志時已得嘔血疾垂

危猶手檢一冊訂其錯訛送局未及見書成而卒士林惜之

覃祚倫劉家司人醇謹公正前州牧方奉文建修塘坊義學廉其人命作北路督修首領祚倫毫無所侵卒其不敷者捐貲成之後州牧吳命充鄉約數年賜以善良可式額其先世丁單至今子孫繁衍人以爲厚德之報於此益信

龔旦小龍潭人勤儉孝弟里中有相爭者善爲排解或謝以財却不受旦歿後里人多因口角細故構訟不休僉曰使旦在斷不至是子四人次

子學濱邑庠生

汪惟一父早歿事母極孝中年妻復亡惟一不能再娶躬操井臼以事母母病私取中裙廁踰入子舍身自澣濯

樊恭綢性醇謹言笑不苟卒後鄉鄰訓子弟者皆傳述以爲師法

按五代史一行傳而知歐陽子之取善也寬矣方崗蠻據險自雄此與梁唐之壞亂無以異自歸版圖而此風丕變十室之邑必有忠信三人並行厥有我師豈如蠻花狢鳥之無知者哉

列女

謝國綸妻唐氏居城坊年二十五夫歿子方昇甫  
三歲氏撫之稍長延師課讀涉書史每道其母  
苦節輒嗚咽涕泣乾隆十四年知州胡式璟詳  
請咨部奉

旨旌表

譚文用妻傅氏居燕子坪年二十四寡遺孤方四  
歲氏堅志撫子迄於有成乾隆十四年知州胡  
式璟詳請咨部奉

旨旌表

鶴峯州志

卷十二

人物

十五

部灝妻張氏年二十夫亡子生林甫六月氏矢事  
翁姑撫孤子備極勞瘁兼能經理家計衣食贍  
給爲子捐從九職銜乾隆五十九年知州何學  
青詳請咨部奉

旨旌表

鄒龍妻李氏年二十五夫亡子女俱無翁姑竊憐  
之託鄰嫗勸改嫁氏輒正色以拒翁姑知其志  
堅聽之歷四十餘年粗衣糲食足不踰閭罕有  
聞其言笑者乾隆五十九年知州何學青詳請  
咨部奉

旨旌表

覃世相妻田氏年二十六歲寡子甫三歲家甚貧氏矢志撫子未冠而死孤苦終身備茹荼蓼

吳之書妻康氏許字後書病癱兩姓父母患書病不能痊議欲改字氏不從乃成昏調藥餌不避穢惡年二十八歲而夫故氏撫子苦節辛荼備嘗

劉百祥母羅氏年十九歲寡百祥甫一歲家無長物氏冰蘖撫孤門戶皆待以支持命百祥就學鄉塾補諸生

鶴峯州志

卷十二

人物

十六

鄒永珍妻徐氏年二十九夫亡家徒壁立而有四子衣食所需皆待氏經營茹荼嘗蓼任兼男女四子皆賴以成立戚鄰憫之

田金南妻翟氏年三十夫故有一子二女氏撫之昏嫁皆畢甫生一孫而子又亡氏復撫孫兩世零丁卒能箕裘不墜迄今衣食饒足並皆粗習書史故鄉人憐其苦而服其能

袁逢春妻田氏年二十夫以征苗匪陣亡而遺腹子始生氏苦節撫孤知州范繼昌旌其門曰蘭心鍊性

覃文翰妻周氏許字後文翰父母相繼歿氏時年十六而文翰甫八歲氏知文翰家撫孤無人請於父母曰郎無所倚女願待字其室以肩家事父母許之遂往任操作碩黦織屑月沒星替並勸文翰附村塾讀書兩涇則背負往還文翰粗識文字衣食亦不缺乏皆氏力也生四子年六十五先文翰卒

王文蔚妻李氏年二十六夫歿一女甫三歲無子氏柏舟自守擬俟夫第生子爲夫承祧而夫第復艱子嗣乃招壻爲終老計

周德興妻謝氏年二十七夫亡無子有二女俱幼親鄰憐其貧無所倚諷以再嫁氏不從撫女擇配完潔無疵以針黹度日

雷開科妻戴氏夫爲衛昌營外委征教匪陣亡氏時二十六歲有一子甫二歲逾年夫歿氏母居桑植苦竹壩老而無子氏遂往事奉而以夫第襲世職後夫第生子氏爲夫立嗣夫第歿以嗣子請襲氏遭倫紀之艱而完節守貞慈孝兼盡爲巾幗所罕有

生員部生樑妻覃氏年二十九夫歿三子皆幼其

姑哭之慟氏諫曰未亡人撫遺孤以事姑猶夫在也姑過於哀傷設有不諱如諸孫何姑爲之節哀氏孝事老姑延師課子以儒業世其家嚴女許字梅姓梅以移業遷陝西數年遠問不通人傳爲已死嚴父母更字他姓及親迎在途聞梅姓由陝歸娶不敢成昏女兩不欲行遂雉經死以解訟端州判王惟球爲作烈女傳入藝文志

黎家祥母杜氏孝事翁姑嘗值姑病醫藥弗效氏禱於神割股肉奉之病漸愈子家祥家彬皆諸

生

覃秀林妻劉氏年十九而夫亡氏撫孤孀守孝事老姑不衰學師蕭矜其志節白於學憲沈旌其門曰松貞荻誨

吳在德妻李氏生員李靜安之長女年二十二歲夫歿家極貧氏孝養翁姑撫遺腹子與榜成立備極艱苦今抱孫矣年六十餘言笑不苟巾幗中以爲矜式

柳興舉妻恩貢向廷杰之姑年二十三歲夫歿氏甘守苦節撫二子文煥文炳蚤夜力作衣食得

以粗給年七十餘諸孫林立擇聰俊者負笈從師前訓導陳文煊道經其宅贈以匾曰節厲熊丸

生員謝士璠妻岳氏年三十歲士璠以鄉試歿於途氏痛不欲生勉撫二子以養以教俾至於成人以一子承夫兄祧

洪繼武妻戴氏年二十八歲夫亡無子氏以夫兄子聖時承祧視如己出聖時應武試爲庠生

李士茂妻子氏生員于吉爻之姪年十九而夫亡子僅一歲氏冰霜自矢依母家度日撫子成人

鶴峯州志

卷十二

人物

九

于淳妻李氏年二十六歲夫歿氏紡績度日養葬翁姑備盡婦道撫二子可克家

徐南極妻鍾氏年二十八歲夫亡孝事翁姑撫二子引年願年業儒引年弱冠入邑庠氏六十二歲卒

劉國棟妻鄧氏年三十歲夫亡子開泰甫一歲氏孀守撫孤勤儉臻至嚴督開泰誦讀補諸生

周必洸妻趙氏年二十四歲夫亡止一子氏上事翁姑下撫幼子險阻艱難備嘗之矣非松柏爲心曷克臻此

生員余情芳妻李氏夫本安福籍僑居邑劉家司以授讀爲業氏年二十八歲夫亡家無擔石氏矢節匪他紡霜績雪以撫其子卒無忝於所天唐玉先妻劉氏年二十七歲夫亡三子皆幼氏縮衣齋食勤紡績而勗詩書命其子屢應學試氏歿時猶以未補諸生爲憾

王世聰妻鄧氏年十八歲于歸三月而夫故姑痛哭屢絕氏泣跪姑前曰氏卽姑子也姑以無子難守氏撫夫兄子承祧家雖貧窘而仰事俯畜皆能經營

龔經文妻皮氏年二十六歲夫亡遺一女氏撫姪爲嗣生一孫而嗣子歿氏撫孤兩世備著苦節李斌妻江氏年三十夫故氏清操自矢孝養翁姑撫子成立壽至八十一歲

何逢龍妻燕氏歲貢何夢芝之長媳年二十五歲夫亡子甫三歲氏矢志孀守所居三岔口至火燒嶺山路險峻氏請於夫翁捐金修治行旅便之

張天倫妻黃氏年二十九歲夫亡氏守貞苦節恩勤鬻子乾隆三十六年前州牧方天葆旌以匾

額曰名烈柏舟

樊尙華妻劉氏生員樊彬之祖母年二十六夫亡氏冰兢自守撫育其子翁姑亦爲之歡顏慈孝交盡閨中之彥

田光輝妻王氏年二十一歲夫亡氏勤儉持家數米稱薪卒能事翁姑而撫孤嗣以完太璞而溫惠淑慎尤爲鄉里所景慕子士選補諸生

朱浩妻高氏年二十七夫亡氏礪節如松堅心似石事翁姑以孝撫孤子以慈而持家嚴謹賢於古之名媛

鶴峯州志

卷十二 人物

三

康士淇妻田氏生員田光普之姑母年三十夫亡氏勵志完貞甘荼如薺現年八十有三

劉民表妻田氏生員田種德之姊年二十六歲夫歿無子家極貧不能繼嗣氏誓不再醮依母家度日現年七十有六

孫學禹妻喻氏年二十四歲夫亡無子氏守口如瓶防身如城撫夫姪爲嗣孝養翁姑備極勤劬按仁者不以盛衰改節義者不以存亡異心不謂僻陋在鶴乃有婦人而爲烈丈夫者接踵相望彤管未輝豈所以激揚貞風哉悲鏡鸞而孤掩惜釵

鳳以分飛  
雖磨筭化  
石茂以加  
諸固知十  
八拍未  
足歌也

鶴峯州志

卷十二 人物

從祀昭忠祠營弁

張兆虎任衛昌營千總征大金川陣亡

劉榮任宜都營把總征勦教匪在來鳳縣旗鼓寨陣亡

田繼秀衛昌營把總征勦教匪在陝西洵陽縣三

溪河陣亡

向升榮施南協外委把總征勦教匪在長樂縣四方臺陣亡

雷開科任衛昌營外委把總在房縣一碗泉陣亡  
從祀昭忠祠兵丁

鶴峯州志

卷十一

人物

三

袁龍 袁逢春 金友德 胡方來 辛宏舉

岳宏烈 吳兆富 邵開鼎 高登富 喻得勝

車廷華 劉貴 洪永升 熊天元 覃升

袁士雄 田輝斗 羅義開 張懷 唐得榮

田林受 李天富 洪繼相 張永珍 全德

趙士忠 王世臣 唐學周 袁士傑 陳開運

孫金得 鄧開元 金鳳 張大科 桂得科

向升恒 徐國相 魏光廷 曾士魁 孫順

劉士相 向升元 田義南 黃相忠 田炳斗

王廷輝 吳光太 馬懷 楊宏 王作順

周繼武 甄之鳳 田國受 王有義 曾士龍  
孟光才 周華 徐宗先 張正鳳 徐允康  
覃繼賢 魏光賢 劉金魁 劉士杰 覃太  
劉景 唐明魁 向祚華 羅春 游之倫  
桂連 葉允盛 田光才 田明萬 張廷秀  
徐國 王有臣 李元 田雲斗 孫開富  
唐繼學 羅正開 桂得忠 易顯德 葉永德  
羅文華 唐珍 廖中科 王貴  
王大烈 鄉勇

按屈左徒之哀國殤也出不入兮往不反平原忽

兮路超遠帶長劍兮挾秦弓首雖離兮心不懲誠  
旣勇兮又以武終剛強兮不可凌身旣死兮神以  
靈魂魄毅兮爲鬼雄嗚呼斯言也豈但慰死魂哉  
亦足以作士氣張國威矣

耆壽

紳耆年歲相符者附列

向子貴年一百零八歲嘉慶十四年詳報有案

龔傳瑜年九十三歲任蒲圻縣訓導告歸曾元十

餘人

陳東陽年九十六歲住謙吉里孫曾繁衍嘉慶二

十四年詳報有案

田儀如年八十四歲住在田里

田萬選年八十四歲住在田里

嚴玉賢年八十五歲住謙吉里

潘玉美年八十六歲住純化里

鶴峯州志

卷十二

人物

三

饒朝宗年八十八歲住正德坊

以上八十以上五名嘉慶十四年詳報有案

于自貴年八十一歲住正德坊

唐康國年八十五歲住和平里

向士文年八十二歲住在道里

黃允連年八十六歲住在道里

張成周年八十一歲住在道里

姚玉甫年八十三歲住在田里

燕緒承年八十四歲住在田里

譚邦旭年八十七歲住在田里

以上八十以上八名嘉慶二十四年詳准在案

馬安年八十歲

梅士親年八十七歲

孟仕智年八十六歲

康國禮年八十六歲

王錫爵年八十七歲

田士遇年八十歲

胡大經年八十歲

宿子文年八十九歲

以上八十以上八名現據採訪補報係品行端

方者合並列入

按張蒼事秦柱下而至漢孝景思邈生隋開皇而及唐永淳古有其人乃今於向子貴等親見之其可使與編戶齒乎三老李躬五更桓榮邈乎不可及已今據已報未報者並皆錄之於篇庶知絳縣老人不可見役於輿尉也

部生棟性孝友年十七以身肩家事俾其兄弟得  
專心誦讀分爨後兩弟相繼卒子俱幼皆賴其  
經理督教排難解紛尤爲鄉里所重其歿也來  
弔者皆號泣而去

楊世忠奇峯關人充衛昌營兵丁性慷慨人以事  
相譟諉皆力爲之盡有分爭者反覆開導婉爲  
調停必事寢乃已在行伍中真鉄中錚錚者

洪先燾乾隆戊申科舉人初任廣東大埔縣事以  
勤廉稱士民愛戴卹篆後大署民之父母四字  
於行舟以餞之補三水令調署南海因失查被

議解組歸以文章培植後起與部生榕分葺邑  
乘稿甫定而病卒邑鄉舉暨任民社皆自先燾  
始未竟其用士林惜之

田應富妻劉氏年二十五夫歿一子甫三歲家無  
次丁氏內外兼營撫子成立孫三人長興邦補  
邑諸生

長樂縣縣丞羅文杰字甫田四川富順人娶邑人  
彭聯勳之女爲繼室羅卒於官舍彭甫二十六  
歲官况清苦不能扶櫬回蜀暫殯於漁洋關彭  
撫一子一女以針黹度日貞白自矢脩嘗茶蓼